

Meeqqanik inuusuttunillu ikiorsiisarneq pillugu Inatsisartut peqqussutissaattut siunnersuummut nassuiaatit.

Nalinginnaasumik nassuiaatit

Meeqqanik inuusuttunillu ikiorsiisarneq pillugu Inatsisartut peqqussutissaattut siunnersuummik matumangga saqqummiussinnermut ilaatigut tunngaviupput Isumaginninnermut Iluarsaaqqinnermik Ataatsimiititaliarsuup isumaliutissiissutaa 1997-imeersoq ilaatigullu meeqqanut inuusuttunullu tunngasut pillugit Inatsisartuni oqallinnerit aalajangiinerillu.

Kalaallit Nunaanni Meeqqat Ukiuanni 2000-imi ataatsimeersuartoqarpoq "Meeqqat inuusuttullu isumagineqarneranni suleriaatsit nutaat", maleruagassat aaqqissuuteqqinnissaannik suliniuteqarfiillu pitsanngorsarneqarnissaannik arlalitsigut siunnersuutinik saqqummiussisoqarluni. Siunnersuutit taakku matumani aamma ilanngunniarneqarput.

Pisariaqartitsineq aallaavigalugu ikiorsiinissaq meeqqanik inuusuttunillu ikiorsiisarnermi tun-ngavigineqartalissaq, taamaalilluni qanorpiaq suliniuteqarnissamut aalajangiisuussallutik meeqqap/inuusuttup pisariaqartitai, maannamut tunngavigineqartartoq ilaqutariit ataatsimut pisariaqartitai kisimik isiginiarneqarunnaassallutik. Taamaattumik meeqqap pisariaqartitavii peqqussummi sammineqarput. Kinguneriligassaa tassaavoq ilaqutariinni meerartalinni isumaginninnikkut ajornartorsiutit siusissukkut iliuuseqarfigineqarsinnaalerlutillu iliuuseqarfigineqartussanngussammata. Siusissukkut iliuuseqarnermi ajornartorsiutit meeqqamut inuusuttumulluunniit annertusivallaannginnissaat periarfissinneqassaaq, aammalu ajornartorsiutit annertunerulernatillu artornarsivallaannginnissaat periarfissinneqassalluni.

Siusissukkut akuliunneq aamma pinngitsoorani iliuusissanik pilersaarusiornissaq ilaqutariinni meerartalinni ajornartorsiutit annertusiartuinnarnissaannik pitsaaliueqataassaaq, peqatigisaanillu assersuutigalugu meeqqamik katsorsaanissaq siunertaralugu inissiinissamik pisariaqartitsinerit annikillisissallugit. Taamaattumik angerlarsimaffimmi suliuniutinut, inissiinermi siunertaq erseqqissarlugu, aammalu inissiinerup atorunnaarnerani (suliniutit atorunnaarneranni malinnaaneq) iliuusissanik pilersaarusiornissaq pillugu aalajangersakkat siunnersuutigineqarput, taamaalilluni meeqqap inuusuttulluunniit siunissaa isumagineqartusanngorlugu.

Ilaqutariinnik inuussutissarsiutigalugu paarsisartunik aaqqissuussineq meeqqat inuusuttullu ilaannut ulloq unnuarlu paaqqinniffimmut inissiinissamut taarsiullugu qinigassaassaaq. Ilaqutariinnik inuussutissarsiutigalugu paarsisartunik aaqqissuussineq aamma meeqqanut inuusuttunullu tusilartunut tutsarluttunullu ulloq unnuarlu paaqqinniffimmut inissinneqarnissamik immikkut pisariaqartitsinngitsunut, taamaallaalli immikkut aaqqissuussamik atuartitaanermut taamaallaat illoqarfimmi

allami neqeroorutaasumi malinnaanissaminnik pisariaqartitsisunut iluaqutaasinnaavoq. Taamaattumik ilaqutariit inuussutissarsiutigalugu paarsisartut pillugit siunnersuut ilanngunneqarpoq.

Meeqqap / inuusuttup ilaqutariit nalinginnaasut qanoq ingerlariaaseqarnersut paasinnilersinnissaanik ilaqutariit inuussutissarsiutigalugu paarsisartut periarfissiissapput. Meeqqap / inuusuttup inersimasunit pingaartinneqarnissaa toqqissimatinnissaalu angajoqqaarsiani ajornannginnerussaaq, tamannami ulloq unnuarlu paaqqinniffimmi sulisut nalinginnaasumik nikerartorjuusarneri pissutigalugu ajornakusoortarmat.

Aammattaaq meeqqap misigissusaanut qisuariartarneranullu tunngasut najuuffigiuarnerisigut inersimasut paasisimannilernissaat angajoqqaarsiani periarfissaqarluarnerussaaq taamaalillutillu meeraq akuerineqartutut misigisimalersissinnaallugu. Taamatut qanimut attuumassuteqarnermi aammalu inuussutissarsiutigalugu paarsisartut perorsaanermt tunngassuteqartumik tunuliaqutaqarnerini pikkorissartinneqartarnerinilu meeqqap qisuariarnerinik paasisaqarnissaaq sioqqutsisumillu ilimasoreernissaaq ajornannginnerulissaaq taamaalillunilu meeqqamut ataasiakkaamut suliniuteqarnissaaq siunnerfileruminarnerulissalluni.

Taamaattumik inuussutissarsiutigalugu paarsisartut pillugit siunnersuut ilanngunneqarpoq.

Ilaqutariit inuussutissarsiutigalugu paarsisartut ulloq unnuarlu paaqqinniffinnut tapertaapput. Misilittakkat takutippaat meeqqanut inuusuttunullu katsorsartariaqartunut paaqqinniffinni inissanik pisariaqartitsineq annertusiartortoq, taamaattumillu inuussutissarsiutigalugu paarsisartut ulloq unnuarlu paaqqinniffinnut pioreersunut aamma inissiivissatut tapertaasussatut isumalluutaasinnaallutik.

Meeqqanut inuusuttunullu ulloq unnuarlu paaqqinniffinnut inissinneqartunut atajuarnerusumik ingerlaaseqarnissaaq qularnaarniarlugu inissiinerup atorunnaarnerata kingorna aaqqissuussamik suliniuteqarnissamik aalajangersagaliortoqarpoq, taamaalilluni meeqqap / inuusuttup ulloq unnuarlu paaqqinniffimmit qimagutereernerani malitseqartitsinissaaq suliniuteqarnerullu ingerlaqqinnissaa qularnaarneqarluni.

Siunnersuummi matumani aamma peqqussummi atuuttumi aalajangersakkat siumugassaapput, taakkuli malinneqarnerini kommunit tamatigut siunertaq eqqarsaatigisassavaat, taamaalilluni siunertaq naapertorlugu peqqussut atuutsinneqassalluni.

Aalajangersakkat ilaannik sukaterisoqarpoq taamaalilluni meeqqap inuusuttulluunniit qitiutinneqarnissaa nalornissutaajunnaassalluni.

Meeqqap pisinnaatitaaffii pillugit Naalagaaffiit Peqatigiit isumaqatigiissutaanni tunngaviusut peqqussummi pingaartinneqarput. Tamatuma malitsigaa meeqqat inuusuttullu misissuinerne suliniuteqarnerinilu tamani tamatigut nammineerlutik

isummersornissaannik ikiorneqassasut. Naqissuserneqarpoq meeqqap inuusuttulluunniit isumai tamatigut ilanngunneqassasut aammalu meeqqap ukiuinut inerisimassusianullu naleqquttumik pingartinneqassallutik.

Inatsisinut allanut attuumassuteqarneq

Kommunik aqutsinermik inatsit 1994-imi iluarsiivigineqarpoq aammalu pisortat ingerlatsineranni suliaasat suliarineqartarnerat pillugu inatsit ukioq taanna akuerineqarluni.

Taamaattumik meeqqat inuusuttullu pillugit peqqussutip matuma iluarsaanneqarnerani inatsisit qulaani taaneqartut marluk malitsigisaannik arlalitsigut allannguutissanik siunnersuusiortoqarpoq, taakkunani aalajangersakkanik nalinginnaasunik peqqussummi atuuttumi immikkut aalajangersakkat taarserneqarmata.

Kommunik aqutsinermik inatsit:

Kommunik aqutsinermik inatsit naapertorlugu kommunalbestyrelsit ataasiakkaat aalajangertussaavaat qanoq ittumik kommunip aqunneqarnerani ileqqoreqqusaqassanersoq. Isumaginninnermut ataatsimiititaliami imaluunniit ataatsimiititaliami ataavartumi allami meeqqat inuusuttullu pillugit suliaasat inissisimanissaannut kommunalbestyrelsip aalajangiisussatut taaneqarsimanera akornutaanngilaq. Aammattaaq suliani ataasiakkaani allaffissornikkut aalajangiinissamut tamanna akornutaanngilaq.

Aalajangersakkanut ataasiakkaanut nassuiaatini tamani kommuni suliaasnik suliarinnittussatut oqartussatullu aalajangiisussatut taakkartorneqarpoq, kisiannili aalajangiinerit kommunalbestyrelsi sinnerlugu aalajangiinerussasut tamatumani soorunami allannguutaanngilaq.

Aqutsinermik inatsimmut naapertuuppoq,

aalajangiinerni ileqqusutut nalinginnaasuumik amerlanerussuteqartut isumaat malinneqartussaasoq

ataatsimiititaliami ilaasortap suliaasaq kommunalbestyrelsimut saqqummiunneqassasoq piumasarisinnaagaa

ataatsimiititaliami siulittaasoq ataatsimiititaliaq sinnerlugu aalajangiisinnaasoq kiisalu

aalajangiinissat utaqqissunneqarsinnaanngitsut kommunalbestyrelsi
sinnerlugu borgmesterip aalajangiiffigisinnaagai

Peqqussummi atuuttumi aalajangersakkat ilaanni tunngaviusunut naapertuuttunik
aqutsinermik inatsimmi arlalinnik malittarisassaqaareemat, siunnersuummi
matumani kommunalbestyrelsit aammalu isumaginninnermut ataatsimiititaliat
suliassat/oqartussaassusermik agguataarinninnerat pillugit aalajangersakkat
atorunnaarsinnissat naleqquttuusorineqarpoq.

Pisortat ingerlatsineranni suliassat suliarineqartarnerat pillugu inatsit:

Siunnersuummi suliassat suliarineqarnissaannik aalajangersakkanut pisortat
ingerlatsineranni suliassat suliarineqartarnerat pillugu inatsit, ilitersuineq,
allagaatinik suliassamut tunngasunik ilisimatinneqarnissaq, oqaaseqartussaaitaaneq
aamma suliamik attuumassuteqartumik tusarniaasarneq pillugit aalajangersakkanik
erseqqissunik imaqartoq soorunami tapertaassaaq. Sulianik ingerlatsisup pisortat
ingerlatsineranni suliassat suliarineqartarnerat pillugu inatsimmik suliap ingerlanera
tamaat qimerluuisarnissaa aammalu suliassanik suliarinninnermini immikkut
malittarisassat paragraffini ataasiakkaani nassuiarneqartut ilannguttarnissai
pingaaruteqarluinnarpoq.

Innarluutillit pillugit peqqussut:

Peqqussummi atuuttumi aammalu siunnersuummi matumani meeqqat nalinginnaasut
siunnerfigineqarput. Meeqqanut innarluutilinnut tunngatillugu annertuumik
innarluutilinnut ikiorsiisarneq pillugu inatsisartut peqqussutaanni aalajangersakkat
aalajangersakkanut tapertaassapput.

Naartuersittarneq pillugu Kalaallit Nunaannut Inatsit nr. 232, 12. juni 1975-
imeersoq:

Inuusuttut 18-iliisimannngitsut angajoqqaatik akuersiteqqaarnagit
naartuersinnissaannut inatsisitigut tunngavissaq inatsimmi § 6, imm. 2-imiippoq.

Inatsisit qulaani taakkartorneqartut saniatigut aamma oqartussaasoqarfii
assigiinnngitsunik suliallit pillugit inatsisartut peqqussutaannut aammalu kommunit
akunnerminni akiliiffigeqatigiittarnerat pillugu Inatsisartut peqqussutaannut
attuumassuteqartoqarpoq.

Siunnersuut nassuiaataalu KANUKOKA-mut kommunit sinniisigisaannut,
suliffeqarnermi illuatungeriinnut, kattuffinnut attuumassuteqartunut il.il.
tusarniaassutigineqarsimavoq. Tusarniaanermi akissutigineqartut peqqussutissatut
siunnersuummut ilanngunneqarput.

Aqutsinikkut aamma aningaasaqarnikkut kingunerisassat

Suliniutit nutaat soorlu arnanut naartusunut siusissukkut akuliunneq, ilaqutariinnik katsorsaaneq, oqilisaassineq, meeqqap angerlarsimaffiup avataanut inissinneqarneranut atatillugu angajoqqaanut tapersersuineq, efterskole/ineqarfiutigalugu atuarfimmiinneq, iliuusissanik pilersaarut, ilaqutariit inuussutissarsiutigalugu paarsisartut, ilaqutariinnut paarsisartunut kommunit pisussaaffeqarnerat, Meeqqat pillugit paasisimasalittut qitiusumik ataatsimiititami suliaasaalertussat kiisalu ulloq unnuarlu paaqqinniffinnik kommunimit pigineqartunik pilersisitsinnalerneq soorunami kommuninut Naalakkersuisunullu aqutsinermi suliaasaqarnerulernermik kinguneqassaaq.

Taamaattoq suliaasaqarnerulernermik oqaatigineqartut annikinneroriataarsinnaapput. Allaffissornikkut suliaassat annertunersaat pisortat ingerlatsineranni suliaassat suliarineqartarnerat pillugu inatsit naapertorlugu suliaasaareerput. Assersuutitut taaneqarsinnaapput: suliamut paasissutissiineq, suleqataasunik tusarniaaneq, ataatsimiittarnerit, iliuusissanik pilersaarusiornermut atatillugu allaffigeqatigiittarnerit. Aamma kommunini arnanut naartusunut siusissukkut akuliunneq, ilaqutariinnik katsorsaaneq, oqilisaassineq kiisalu ilaqutariinnut paarsisartunut neqerooruteqartarneq annikigisassaangitsumik pioreerpoq.

Suliniutitut nutaanut imaluunniit pioreersunut allannguutissatut siunnersuutini aningaasatigut naatsorsuisoqarpoq: inuttut siunnersorti, oqilisaassineq, efterskolemiinneq, ilaqutariit inuussutissarsiutigalugu paarsisartut aamma meeqqat paarisassat pilersorneqarnissaannik nalilersuineq, kiisalu ilaqutariinnik paarsisussanik aamma ilaqutariinnik paarsisussanik sullissisunut pikkorissaaneq.

Meeqqanik inuusuttunillu ilaqutariinnut inissiinermut tunngatillugit aningaasartuutit tamarmiusut aningaasatigut kingunerisassat naatsorsorneranni ilanngunneqarput, kommunit ani-ngaasartuutit ilaannik aningaasartuuteqartareeraluartut.

Aningaasartuutaanerulersussat ataatsimoortumik tapiissutit pillugit 2003-imut isumaqatigiisummi ilaareersut katillugit ukiumoortunngorlugit 18,3 mio. kr.-inik annertussuseqarput, takuuk [skema ilanngussaq](#). (pdf-format) Aningaasat taakku 2003-imut Aningaasanut Inatsisissatut siunnersuummut ilanngunneqarput.

2003-imut ataatsimoortumik tapiissutit isumaqatigiisutigineqarneranni tunngavigineqartut peqqussutip naatsorsuutigineqartumit ukiup affaanik kingusinnerusukkut atuutilernissaa pissutigalugu allanngormata 2003-imi aningaasatigut kingunerisassat 18,3 mio. kr.-ininit annikinnerussapput. Taamaalilluni 2003-imut ataatsimoortumik tapiissutit pillugit isumaqatigiisummi tunngavigineqartoq allanngorpoq kommuninullu 2003-imut ataatsimoortumik tapiissutit pillugit isumaqatigiisut isumaqatiginninniutigineqaqqissaaq.

Aalajangersakkanut ataasiakkaanut nassuiaatit

§ 1-imut

Peqqussut aallarnerneqarpoq siunertassaq aalajangersarlugu, ilanngullugu meeraq qitiutinneqassasoq.

Peqqussummi atuuttumi tunngaviusutut atuutsinneqarsimavoq meeqqap ilaqutariillu ataatsimut isigalugit qanoq ikiorserneqarnissaannut angajoqqaat meqqaminnut pisinnaatitaaffii aalajangiisuutillugit. Ilaqutariit tamarmiusut pisariaqartitaat sulii aallaavigineqassapput ikiorserneqarnissaminnik neqeroorfigineqarlutik, kisiannili tamatuma meeqqap ataasiakkaatut pisariaqartitai, amerlanertigut angajoqqaat sumiginnaanerannik tunngaviliisuusartoq ersigunnaarsissanngilaa. Meeqqap inuusuttulluunniit toqqissisimasumik peroriartornissaminik pisariaqartitai tunngavittut aallaaviuvoq.

§ 2-imut

Siunertaq naapertorlugu meeqqanut inuusuttunullu tamanut peroriartornermi sapinngisamik pitsaanerpaamik atugassaqalersitsisoqassaaq. Meeqqanut inuusuttunullu immikkut pisariaqartitsinngitsunut ulluunnerani neqerooruteqarnissamik, atuartitaanissamik il.il. kommunit pisussaafeqarput.

Neqeroorutinut taakkununga tapertaliunneqarput meeqqanut inuusuttunullu immikkut pisariaqartitsisunut peqqussummi matumani aalajangersakkat. Kommunit suliniutissatut peqqussummi periarfissaliunneqartut iluanni suliniutit meeqqamut inuusuttumulluunniit ataasiakkaamut pisuni ataasiakkaani naleqqunnerpaaq qinerneqassaaq. Taamaattumik meeqqamut inuusuttumulluunniit pissutsinik misissuinerup aallartinnerani pisariaqartitap paasineqartup aaqqiivigineqarnissaanut naleqquttuusorineqartoq ikiorsiinissamik periarfissatut piaarnerpaamik aallartittariaqarpoq.

Meeqqanut inuusuttunullu immikkut ittunik pisariaqartitsisunut ikiorsiinissami siunertaavoq peroriartornermi pitsaanerpaamik atugassaqalersitsinissaq, taamaalillutik inuttut saqqummernissamut, ineriartornissamut peqqinnissamullu periarfissaminnik atorluanaanissaat periarfissinneqassammat.

Ikorsiisoqassaaq sapinngisamik siusinnerpaamik, aallaavigalugu siusissukkut iliuuseqarneq arlalitsigut naleqqutinngitsumik pisoqalerneranik unitsitsisinnaammat.

Meeqqanut inuusuttunullu annertuumik timimikkut eqqarsartaatsimikkulluunniit piginnaanikillimasunik imaluunniit immikkut inooqataanermi ajornartorsiuteqartunik, assersuutigalugu imigassamik ikiaroorartumillu atupilunnerup kingunerisaanik imaluunniit tarnimikkut nappaatilinnik angajoqqaalinnut ilaqutariinnut tunngasumik pitsaaliuinermillu suliniuteqarnissap pingaaruteqarnera immikkut innersuussutigineqarsinnaavoq.

Eseqqissarneqarpoq meeqqat ulorianartorsiortunut ilaappata arnanut naartusunut kommuni immikkut suliniuteqassasoq, pissutigalugu meeqqap ineriartornissaanut periarfissanut piffissaq inunngungajalernermi aamma inunngoriitsiarnermi pissutsit annertuumik apeqquataasarmata.

§ 3-imut

Nunap iluani nalunaarusiat ukiut tallimakkaarlugit Naalagaaffiit Peqatigiit Meeqqanut komite-anut nassiunneqartarput tullianillu taamaattoqassaaq 2003-imi. Meeqqanut inuusutunullu atugassarititaasut pillugit ilumoortumik allaaserisaqarnissaq anguniarlugu pingaaruteqarpoq kommunit najukkaminni suliniuteqarnerminnut allanilluunniit pissunik nalunaarusiorlutik peqataasarnissaat.

§ 4-imut

Aalajangersakkami kommunip nakkutiginnittussaataitanera nalorninaallisinneqarpoq.

Nakkutiginnittussaataitanermi pissutsit meeqqat inuusuttullu najukkami inuunermi atugassaannut pingaaruteqartut tamarmik pineqarput. Taamaattumillu aamma oqartussaasunut allanut kommunip pisussaaffigaa pissutsit naleqqutinngitsut ilisimatitsissutiginnissaat.

Nakkutilliinermi kommunimi ingerlatsiviit akornanniinnaanngitsoq aammali pisortat oqartussaasut allat suleqatiginissaat pingaaruteqarpoq, assersuutigalugu nakorsaq peqqinnissakkut nakkutilliisuutitaq. Kommunimi meeqqanut inuusuttunullu neqeroorutunik assigiinngitsunik kommunip ilisimaarinissaannut aamma peqatigiiffinnik namminersortunik namminnerlu kajumissutsimik suliaqartunik suleqateqarnissaq pisariaqassaaq. Tamanna pingaartumik siusissukkat pitsaaliuinissamut periarfissanut tunngatillugu pisariaqarpoq.

Kommunit nakkutiginnittussaataitaneranni aamma pineqarput meeqqat inuusuttullu angerlarsimaffiup avataanut inissinneqarsimasut. Taamaattumik maannakkutut kommunerivitaq pinnani kommunilu meeqqap najuligaa meeqqanut inuusuttunulluunniit avataanut inissinneqarsimasunut nakkutiginnittussaavoq.

Aalajangersakkap erseqqissarpaa nakkutilliineq ingerlanneqassasoq meeraq inuusuttorluunniit immikkut ittumik ikiorserneqarnissamik tapersorneqarnissamilluunniit pisariaqartitsisorinarloq paasineqarpat siusissukkat iliuuseqartoqarsinnaalerna.

Kommunip nakkutiginnittussaataitanera meeqqanut inuusuttunullu kommunimiittunut tun-ngasuuvoq, taamaattumillu aamma pineqarput meeqqat inuusuttullu qimarnguinniittut. Tamatuma nassataraa meeqqanut inuusuttunullu

kommunimi qimarnguinniittunik kommuni attaveqartariaqarlunilu pissutsinik ingerlaavartumik ilisimasaqarniartariaqarmat, siunertaralugu meeqqamut inuusuttumulluunniit ilaqutaanullu siusinnerpaamik nalequttumik ikiorsiinissamik neqerooruteqarnissaq. Tamanna soorunami pissaaq qimarnguinni atuisut kinaassutsiminnik isertuussineranni illersorneqarnerat sianigalugu.

§ 5-imut

§ 5 naapertorlugu nalunaartussaataitanermik malittarisassat § 9 naapertorlugu kommunip a-ngajoqqaatut oqartussaassuseqartumut allanulluunniit meeqqamik inuusuttumilluunniit isumaginnittunut ilaqutariinni ajornakusoorutunik aaqqiiniarnissaq siunertaralugu siunnersuisussaananeranut aammalu kommunip meeraq inuusuttorluunniit immikkut tapersorneqartariaqarsorinarpat pissutsinik meeqqamut inuusuttumulluunniit tunngasutigut misissuisussaananeranut attuumassuteqarput.

Innuttaasut tamarmik nalunaaruteqarnissamik pisussaaffeqarput. Meeqqat inuusuttullu iluamik pineqarnissaat inunnut tamanut aamma kikkunnulluunniit soqutiginarpoq.

Allagaqarnikkut nalunaaruteqartoqartillugu ingerlatsinermi pitsaasumik ileqqoqarnissamut naapertuutissaaq kommunip nalunaaruteqarnermik tigusaqarsimanerminik nalunaaruteqartoq paasitikkuniuk.

§ 5 naapertorlugu nalunaaruteqarneq ima isumaqanngilaq kommuni iliuuseqanissaminik pisussaaffeqalersoq. Saaffiginninnerit ilaanni pisariaqassaaq kommunip § 4 naapertorlugu nalinginnaasumik nakkutiginnittussaataitanerminut atatillugu misissortariaqaraa ikiorserneqarnissamik pisariaqartitsisoqarnersoq.

Ilaqutariit ilisimatinneqartariaqarnersut suliame aalajangersimasumi susoqarnersoq apeqqutaassaaq, kommunilli misissuisoqartariaqalernerani assigisaanniluunniit ilaqutariit sapinngisamik siusinnerpaamik peqataatinneqalernissaat eqqumaffigisariaqarpaa.

Allattuisussaataitanermit tunngatillugu pisortat ingerlatsinerat pillugu paasitinneqarsinnaatitaanermik inatsimmi § 6 innersuussutigineqarsinnaavoq, taanna malillugu paasissutissat suliani pisortanit oqartussanit aalajangiiffigineqartussani suliap aalajangiiffiginiarneranut pi-ngaaruteqartut allatorneqartussaataammata.

Immikkut ajornartorsiutaalertarpoq kinaassutsiminnik isertuussiumallutik saaffiginnissutit. Ajornartorsiutit pissutsini assigiinngitsuni marlunni pilersinnaavoq. Pisup aappaani nalunaaruteqartoq kinaassutsiminik isertuussisoq aamma kommunimut, kinaassutsiminik isertuussilluni nalunaaruteqarneq tunngavigalugu kommuni misissuisariaqarsinnaavoq, pissutsinilu ataasiakkaani sussusia annertussusaalu apeqqutaasorujuussapput.

Pisup aappaani kommunip nalunaaruteqartup aqqa nalunngilaa, taannali ilaqtariinnut kinaassutsiminik isertuussiumavoq. Pisortat ingerlatsineranni suliassat suliarineqartarnerat pillugu inatsimmi § 15 malillugu nalunaaruteqartup aqqa allagaatinik suliassamut tunngasunik ilisimatinneqarnissami ilanngutinngitsoorneqarsinnaavoq, aatsaalli tamanna pisinnaavoq nalunaaruteqartumut immikkut qajassuussinissaq tunngavigineqarsinnaappat, aatsaalli qajassuussinissap taassuma nalunaaruteqartup kinaassusaanik ilaqtariit ilisimatinneqarnissamik pisariaqartitsinerannit ersarissumik pingaaruteqarneruppat. Taamaattumik kommunip nalunaaruteqarnermi neriorsuutigisiinnaanngilaa pineqartup kinaassusaa ilaqtariinnut isertuunneqassasoq.

§ 6-imut

Aalajangersakkap nalorninaallisarpaa misissuinissaq kommunip qanoq aallartissaneraa piviusunngortissaneraalu. 15-leereersimaneq toqqarneqarpoq meeqqap taama ukioqalernermini pinerluttulerinermi minnerpaamik ukiussarititaasut qaangereertarmagit.

Meeraq inuusuttorluunniit misissuiffigineqarnissaminut pinaaserpat, tamanna aalajangiiffigineqassaaq napparsimasup kissaataanut akerliusumik nakorsartinnermut tunngasut maleruagassat naapertorlugit misissorneqarsinnaassanersoq.

Misissuinermi paasinarsippat meeraq innarluuteqartoq, tamatumunnga suliassaq annertuumik innarluutilinnut ikiorsiisarneq pillugu inatsisartut peqqussutaat naapertorlugu suliarineqassaaq.

Najukkami inuit ilinniagaqarsimasut assersuutigalugu ukuusinnaapput, tarnip pissusaanik immikkut ilisimasallit, perorsaasut, meeraaqqerisut, isumaginninnermi perorsaasut. Aalajangersagaq tunngavissaliivoq angajoqqaatut oqartussaassuseqartoq akuersiteqqaanngikkaluarlugu misissuisoqarnissaa anguniarlugu kommunip meeraq inuusuttorluunniit paaqqinniffimmut inissikkallarsinnaagaa imaluunniit napparsimavimmut tarnimikkulluunniit nappaatilinnut immikkoortortamut unitsissinnaagaa.

§ 7-imut

Misissuineq kinguneqarsinnaavoq meeqqamut ilaqtariinnulluunniit tunngatillugu ikiorsiiniutinik aallartitsinissamik kommuni aalajangiisoq. Ikiorsiiniutit sapinngisaq tamaat atorluarniarlugit erserineqassaaq angajoqqaat meearluunniit ikiorsiinissamut qanoq isumaqarnerisut.

Ikiorsiissutit assigiinngitsut § 9-mi taakkartorneqarput.

Ilaqtariit ataatsimoortillugit suliniuteqarfigineqarnissaat periarfissaqaraluartoq Meeqqap pisinnaatitaaffii pillugit Naalagaaffiit Peqatigiit isumaqatigiissutaanni piumasarineqartutut tamatigut meeraq/inuusuttoq taakkulu pisariaqartitaat aallaavigineqartassaaq.

Siunertaavoq suliniutit suusinnaaneri assersuuteqarnikkut, aammalu qaqugukkut periarfissat assigiinngitsut atorineqarnissaat naleqqunnerusinnaanersoq ilitsersuummi nassuiarneqassasut.

§ 8-imut

Aalajangersagaq malillugu tamatigut meeqqap oqaloqateqarnissamik periarfissinnissaanut kommuni pisussaaffeqavinngilaq. Ataasiakkaatigut kommunip naliliivigissavaa, meeqqamut iluaqutaasumik suliaq pillugu oqaaseqarsinnaanersoq. Meeraq oqaaseqarumannginnissaminik pisinnaatitaavoq, tamatumunngalu paasisutissaq suliame ersersinneqassalluni.

Kommunip meeqqap oqaloqateqarnissaanik periarfissiineranut angajoqqaatut oqartussaassuseqartoq akerliusinnaanngilaq.

Pisortat ingerlatsineranni suliassat sularineqartarnerat pillugu inatsit aalajangersaavoq, qaqugukkut kommuni suliame attuumassuteqartunik tusarniaasussaatitaanersoq. Aalajangersakkalli sukulluunniit suliame attuumassuteqartunik tusarniaasarnissamut akornutaanngillat. Sulianik ingerlatsinermi ileqqorisaarnerussaaq suliame attuumassuteqartunik aamma tusarniaasoqassappat, naliliisoqarpat aalajangiinissamut tunngaviusut takunissaannut piunagunilu oqaaseqarfiginissaannik inuusuttoq soqutiginnissinnaasoq, tamatumani imaassimanngippat tamanna pisortat imaluunniit namminersortut allat soqutigisaannik pingaartitsinermut akerliusoq.

Oqartussaasoqarfiit assigiinngitsunik suliallit ataatsimiititaat meeqqat atuarfianiit, isumaginnittoqarfimmiit peqqinnissaqarfimmiillu sinniisoqarpoq, suliassaqarfiilu Inatsisartut peqqussutaanni nr. 14-imi, 1. november 1982-imeersumi takuneqarsinnaapput.

§ 9-imut

Meeqqami ilaqtariinnilu pissutsit imaappata kommuni ikiorsiinissamik neqerooruteqartariaqartoq, angajoqqaatut oqartussaassuseqartup aamma meeqqap, taanna 15-ileereersimappat, akuersinissaannik kommuni piunasaqassooq. Meeqqamut neqeroorutigineqartoq meeqqap immiini, ilaqtumini avatagiisiminiluunniit ajornartorsiutinik qaangiiniarluni immikkut pisariaqartitsineranik aallaaveqassaaq. Ikiorsiiniarluni suliniut ataasiinnaasinnaavoq ataatsikkulluunniit arlaliusinnaallutik.

Suliniutit iluatsittumik ingerlanissaannut tunngaviuvoq angajoqqaat meeqqallu suleqataanerat aammalu pineqartut tamatumunnga piumassuseqarnerat. Sapinngisamik ikiorsiinissatut aalajangiunneqartoq meeqqap inuusuttullu pisariaqartitaanut naapertuutissaaq, taamaattumillu angajoqqaatut oqartussaassuseqartoq imaluunniit allat meeqqamut inuusuttumulluunniit isumaginnittut paaseqatigalugit suliniutit aallartinneqarlutik. Aammattaaq ilaqutariit tamarmik suliniuteqarfigineqarsinnaassapput taamaattumillu meeqqap, inuusuttup aamma angajoqqaatut oqartussaassuseqartup suliniutini suleqatiginissai pingaaruteqarpoq.

Ikorsiiniarluni suliniutit tulleriinnilersorneri suliap ingerlanerani piffissamik pingaarnersuinerit paasineqassanngillat. Aalajangersakkat ilaat ersarereermata immikkut itisilersorneqanngillat.

Nr.1 pillugu:

Ilaqutariinnut isumaginninnermi sullissinikkut ikiorsiinnermi aallaaviussaaq immikkut paasisimasalinnik oqaloqateqarneq.

Ilaqutariit aamma meeqqap inuusuttulluunniit oqaloqatigineqartarnerisa kingunerisinnaavaa, naliliisoqartoq erseqqissaasoqartariaqartoq ilaqutariit periaaseq aalajangersimasooq malissagaat, immaqa suliniutinut erseqqinnerusumik taaneqartunut atatillugu assersuutigalugu:

- meeraq ulluunerani neqeroorutini qinnuteqaallugu,
- meeqqap inuusuttulluunniit atualernissaanik allatulluunniit ilinnialernissaanik qinnuteqarlutik, inuusuttut klubbiat assigisaannilluunniit, imaluunniit
- meeraq peqatigiiffinni assigiinngitsuni peqataassasoq.

Nr. 2 pillugu:

Ulluunerani paaqqinnittarfinni isumaginninnikkut perorsaannermik imalimmik neqerooruteqartoqarsinnaavoq, tamatumani ersarippat meeqqap angajoqqaaminit pissarsiarisinnaanngisaminik immikkut inuummarissarneqarnissamik, ulluinnarni pisartunik suliassaarnissamik pisariaqartitsisoq. Inuusuttumut iluaqutaasinnaavoq assersuutigalugu ilinniarnissaq imaluunniit suliffimmut naleqqussarnissaq siunertaralugu sulilluni misiliinermik aallartitsineq.

Nr. 3 pillugu:

Ilaqutariinnut ikorsiineq tassaasinnaavoq ilaqutariit ulluinnarni aaqqissuulluakkamik inuunissaannik tapersersuineq, meeqqat atuariartornissannik, timersoriarnissaannik

assigisaannilluunniit isumaginninneq, angajoqqaat meeqqaminnut killilersuinissaannik tapersersuineq, angajoqqaat sammisassaqaarnissaannik kajumissuseqalersitsiniaaneq aammalu ilaqutariit avatagiisiminnut attaveqarnissaannik tapersersuineq.

Tapersersuineq inummit kommunimit atorfeqartinneqartumik angerlarsimaffimmi ingerlanneqassaaq, siunertaralugu ilaqutariit ingerlalluarnerulernissaat imaluunniit angajoqqaat nukittorsarnissaat. Tapersersuineq perorsaanertut issinnaavoq aammalu suliaassanik suliaqarnerusinnaalluni imaluunniit arlaannik pisariaqartitsineq malillugu. Sulisussaq suliamut tulluartuunersoq aalajangiinermi nalilersorneqassaaq ilaqutariit pisariqartitaannut tunngatillugu piginnaanerit suut pisariaqarsorinarnersut nalilersorneqassallunilu ajornartorsiutit qanoq ittuunersut.

Tapersersuineq piffissani nikerartuni pisinnaavoq qaammatialunniit ukiunut arlalinnut, aammalu tapersersortip ilaqutariinniittarnera nikerartuusinnaalluni ullut tamaasa tiimerpaalunniit sapaatip akunneranut ullulluunniit 14-ikkaarlugit ataasiarluni marloriarluniluunniit pulaartarnermut, apeqqutaalluni qanoq annertutigisumik suliniuteqarnermi ajornartorsiutit ikiorsiivigineqarsinnaanersut.

Nr. 5 pillugu:

Assersuutigalugu ernereernerup kinguninngua inissiinissaq pisariaqarsinnaavoq, anaanaasup naartunerani ersarippat, isumaginninnissaminut piginnaassusikitsoq imaluunniit inoorlaap paarinissaanut isumassornissaanullu ilisimanninnera amigarpat. Kommunip anaanaq meearlu ulloq unnuarlu paaqqinniffimmut ataatsimoortillugit inississinnaavai, anaanaasoq suleqataarusuppat suleqataasinnaappallu aammalu ungasinnerusoq eqqarsaatigalugu meeqqap isumaginissaa ilikkarsinnaagaa ilimanaateqarpat. Anaanaasup inissiinermi siunertaq aammalu angerlartitsinermi imaassinnaasoq meeqqani angerlaqatigisinnaannagu ilisimaarissavai.

Nr. 6 pillugu:

Aalajangersagaq oqilisaassinertut inissiinissamik tunngavissaliivoq, tamatumani oqilisaassineq inissiinissamik maleruaqqusaniitinnagu. Tamanna atuuppoq oqilisaassinermi meeqqanut inuusuttunullu timimikkut eqqarsartaatsimikkullu piginnaanikillimasanut imaluunniit meeqqanut inuusuttunullu inooqataanermi ilungersunartorsiortunut. Oqilisaassinermik aaqqissuussineq arlalinni siunertaqarsinnaavoq, assersuutigalugu angajoqqaanik oqilisaassineq, meeqqamik perorsaniarnermi tapersersuineq imaluunniit meeqqamik assigiinngitsutigut sungiusaaneq. Tamatigut pineqarpoq meeqqanut inuusuttunulluunniit angerlarsimaffimmiittunut ikiorsiineq.

Piffissaq eqqarsaatigalugu oqilisaassinertut inissiinerit uteqattaartumik ullumik ataatsimit marlunnut sapaatip akunnerinut marlunnut pingasunut

sivissuseqarsinnaapput. Oqilisaassineq pineqartoq ukiut arlerlugit taamatut ingerlasinnaavoq, imaassinnaalluni peroriartorneq tamaat.

Ulluinnarni sulinermi oqilisaassinertut inissiineq aamma atorneqartarpoq nikerartumik paaqqinniffimmuut ulloq unnuarlu inissiinertut, ilaqutariinnut inuussutissarsiutigalugu paarsisartunut imaluunniit ilaqutariinnut paarsisartunut. Taamaattoqartillugu oqilisaassinermi inissiineq nr. 10 malillugu ulloq unnuarlu inissiinermut ilaavoq.

Nr. 9 pillugu:

Meeqqap inuusuttulluunniit ineqarfiutigalugu atuarfimmiinneranni efterskole-miinneranniluunniit angajoqqaat aningaasartuutissaasa matussuserneqarnissaannik ikiorsiinissamik aalajangersakkami periarfissiisoqarpoq, tamatumani pineqarnani meeqqamik inuusuttumilluunniit angerlarsimaffiup avataanut inissiineq.

Aalajangersagaq pisuni arlalinni atorneqarsinnaassaaq, kommunip meeqqap inuusuttulluunniit ineqarfiutigalugu atuarfimmiinneq/efterskole-miinneq iluaqutigissagatippagu, angajoqqaallu nammineq akiliutissaminnut tamakkiisumik ilaannakortumilluunniit aamma/imaluunniit angalanermut nammineerlutik akissaqangippata. Ikorsiisoqarsinnaavoq meeqqap/inuusuttup ajornartorsiutai, ilanngullugit eqqarsartaatsikkut ajoqusernerit, annertuvallaanngippata, angerlarsimaffiup avataanut inissiinissamut tunngaviusussanit annikinnerullutik.

Nr. 10 pillugu:

Suliniutinut allanut aalajangersakkami taakkartorneqartunut ataqtigiissillugit angerlarsimaffiup avataanut inissiineq nalilersorneqassaaq. Inissiinermi siunertaq naammassiumallugu ilaqutariinnut ikiorsiinertut suliniutit arlallit pisariaqartinneqarsinnaapput.

Inuusuttoq 18-iliisimangitsoq nammineq meeraqartoq meeraq ilagalugu angerlarsimaffiup avataanut inissinneqarpat inissiineq isigineqassaaq inuusuttumut meeqqamullu ataatsimut ikiorsiinermi suliniutit. Taamaattumik meeqqap angajoqqaatut oqartussaassuseqartoq ilagippagu immikkut meeqqamut tunngasumik aalajangiisoqassanngilaq.

Nr. 11 pillugu:

Aalajangersagaq nutaajuvoq ilanngunneqarlunilu kommunip meeraq, inuusuttoq suleqatigalugu suliniutinik ingerlateqqiinnissaata pingaaruteqarnera naqissuserniarlugu, meeraq, inuusuttoq ikiortariaarunnissaata, taamaalillunilu peqqussut manna naapertorlugu ikiorserneqarani nammineersinnaalernissaata tungaanut.

Aalajangersagaq imm. 3-mi kommunip siunnersuutaanut piumasaanulluunniit toqqaannartumik atassuteqartumik aningaasartuutinut ilaqutariit nammineerlutik akissaqartinngisaannut ikiorsiinissamik aalajangersagaq periarfissiivoq, tak. nr. 1.- imit 11-imut.

§ 10-imut

Akuersisitseqqaarnani angerlarsimaffiup avataanut inissiisarneq pillugu aalajangersakkat peqqussummi atuuttumi aalajangersakkanut naleqqiullugu ersarinnerulerput. Erseqqissarneqarpoq qaqugukkut kommuni iliuseqartassanersoq akuersisitseqqaaranilu inissiissanersoq. Immikkoortitsineq ersarippoq § 9-imi angajoqqaatut oqartussaassuseqartoq suleqatigalugu ikiorsiiniuteqartarneq aamma § 10-imi pinngitsaaliinikkut akuliuttarneq.

Pisariaqartitsineq aallaavigalugu iliuseqarnissaq isumaqarpoq angerlarsimaffiup avataanut inissiisoqarsinnaasoq, meeqqap pisariaqartitavii naammassineqarsinnaasimanngippata meeralu immikkut isumassorneqarnissamik paarineqarnissamillu pisariaqartitsippat, imaluunniit meeqqap / inuusuttup allatigut ineriartornerata peqqissusaatalu annertuumik ajoquserneqarnissaa navianaateqarpat.

Nr. 1 malillugu akuersisitseqqaarani angerlarsimaffiup avataanut inissiinissamik kommuni aalajangiisinaavoq, meeraq inuusuttorluunniit inuunermini toqqissimananngitsunik atugaqarpat aammalu meeqqap inuusuttulluunniit angerlarsimaffimmiiginnarnissaa kommunimit akuerineqanngippat.

Nr. 2 malillugu meeqqap inuusuttulluunniit ineriartornera peqqissusialuunniit annertuumik ajoquserneqarnissaannut navianartorsiorneq tassaasinaavoq meeqqamat inuusuttumulluunniit persuttaaneq, imaluunniit kinguaassiutitigut atornerluisoqarnera pasitsaanneqarsimappat imaluunniit innarliivigineqarsimappat.

Nr. 3 malillugu navianartorsiorneruvoq meeraq inuusuttorluunniit atuipilunnermik ajornartorsiuteqarpat, pinerlunniarnermik pissusilersortuuppat imaluunniit allatigut annertuumik inooqataanermi oqimaatsorsiorpat, meeqqap inuusuttulluunniit angerlarsimaffimminiiginnarneratigut qaangerneqarsinnaanngitsunik. Meeqqap naleqquttumut inissinneqarnissaa kommunip isumagissavaa.

§ 11-imut

Aalajangersakkamiippoq angajoqqaatut oqartussaassuseqartoq suliamut aalajangiisoqannginnerani oqaaseqarsinnaatitaaneranik kommunip paasititsisussaataitanera. Matumani oqaatigineqarpoq angajoqqaat illersuisoqarnissamik neqeroorummik atuerusunnginneranni pisussaaffik taanna kommunip immikkut eqqumaffigisariaqaraa. Aalajangersagaq malillugu pisussaaffiup kommuni suliamut attuumassuteqartumut tusarniaasariaarutsinngilaa,

tak. pisortat ingerlatsineranni suliassat suliarineqartarnerat pillugu inatsimmi § 19-imi maleruagassat.

Aalajangersakkami taamaallaat kommuni piumaffigineqarpoq pisortat ingerlatsineranni suliassat suliarineqartarnerat pillugu inatsimmiittoq pisinnaatitaaffik ataasiinnaq suliamut attuumassuteqartumut ilisimatitsissutigissagaa. Tamatuma malitsigaa aallagaatinik suliamut tun-ngasunik ilisimatinneqarsinnaatitaaneq suliamut attuumassuteqartut pisinnaatitaaffigisaat. Pisortat ingerlatsineranni suliassat suliarineqartarnerat pillugu inatsimmi aamma allagaatinik suliassamut tunngasuni ilisimatinneqartussaataitanermi pineqanngitsunik aalajangersakkat taamaalillutik atuutissapput.

Imm. 2-imi aalajangersakkami qularnaarneqarpoq meeqqamik isumaginnittoq pisortat ingerlatsineranni suliassat suliarineqartarnerat pillugu inatsit naapertorlugu suliamut attuumassuteqanngikkaluarluni tusarniarneqartussaataammat.

Angajoqqaat imaluunniit meeqqamut inuusuttumulluunniit isumaginnittoq akisuteqaateqan-ngippata kommuni akuersisitseqqaarnani inissiinissaa aalajangersakkami akornuserneqan-ngilaq. Taamaattumik angajoqqaat akuersisitseqqaarani inissiinissaq akornusersinnaanngilaat, sumiinnerminnik ilisimatitsinaveersaarnermikkut imaluunniit oqaaseqaateqarnissamik piumasaqaatip akinaveersaarneratigut.

§ 12-imut

Aalajangersakkap qularnaallisissavaa angajoqqaatut oqartussaasuseqartup sapinngisamik piaarnerpaamik meeqqap angerlarsimaffiup avataanut inissinneqarnissaanik aalajangiisoqarneranik ilisimatinneqarnissaa.

Nukiginnartumik inissiisoqarnissaanik aalajangiineq pillugu aammalu paasisutissanik annertunerusunik pissarsiniarunik imaluunniit meeraq angerlarteqqinniarunikku sumut saaffiginnissinnaanersut pillugit nalunaarut angajoqqaatut oqartussaasuseqartup najugaanut tunniunneqarsinnaavoq. Aalajangiineq tunngavilersorneqarsimassaaq taamaattoqartillugulu tunngavigissallugu naammappoq meeraq inersimasumik akisussaasuseqartumik nakkutigineqanngitsoq naammattoorneqarsimasoq taamaattumillu meeqqap toqqissisimanissaa inuulluarnissaalu pingaartillugit angerlarsimaffimmit peersinneqarnissaa pisariaqartoq.

Sivisunerusussamik inissiinissamik aalajangiinermi nalunaarut aamma taamatut tunniunneqarsinnaavoq, kisiannili aalajangiinermi tunngaviusoq nassuiaqqissaarneqassaaq.

Pisuni taakkunani marlunni ilisimatitsissutigineqassaaq aalajangerneq isumaginninnermut naammagittaalliuuteqartarfimmut naammagittaalliuutigineqarsinnaasoq.

§ 13-imut

Ullumikkut Pisortaqarfiup nunap immikkoortuini immikkoortortaqarfiinut nalunaarut ingerlanneqartarpoq siunissamilu aamma taakkununnga nalunaarut ingerlanneqartassaaq.

§ 14-imut

Meeqqanut inuusuttunullu aamma annertuumik innarluutilinnut ulloq unnuarlu paaqqinniffiit il.il. pillugit Namminersornerullutik Oqartussat nalunaarutaat nr. 64, 29. december 1994-imeersoq naapertorlugu angerlarsimaffiup avataanut inissiinissamik aalajangiisoqannginnerani kommunit iliuusissanik pilersaarusiortussaapput. Ullumikkut annikitsumik taamaaliortoqartarpoq, kisiannili meeqqat angerlarsimaffiup avataanut ilaqutariinnut imaluunniit ulloq unnuarlu paaqqinniffinnut inissinneqartartut pillugit misilittakkat takutippaat amerlasuutigut iliuusissanik pilersaarusiortoqartanngitsoq.

Nukinginnartumik inissiinermi § 10-imi aalajangersakkat naapertorlugit suliarineqartumi, inissiinermi siunertaq naatsukullammik nassuiarneqassaaq, meeraq ullulluunniit pingasuinnaat qaangiunnerisigut angerlaqqissangaluarpalluunniit. Meeqqamik nukinginnartumik inisseeqattaarnermi iliuusissanik pilersaarusiakkut ersarinnerulissaaq meeqqamut / ilaqutariinnut ikiorsiiniutinik aallartitsisoqartariaqartoq taamaalilluni ajornartorsiutit alliartuinnannginnissaat pitsaaliorneqarsinnaalerluni.

Iliuusissanik pilersaarusiornermi ilusilersuinermi ilaqutariit meerarlu peqataatinneqassapput. Soorunami kommunip suliamut immikkut ilisimaarinnittutut suliniutit nalilersussavai iliuusissanillu pilersaarut suliarissallugu, aammalu kommunip akisussaaffigaa iliuusissanik pilersaarusiamik suliaqartoqassasoq.

Suliniuteqarnek annikinnerusoq sivikinnerusorlu pineqarpat taamaallaat iliuusissanik pilersaarusiortoqassaaq angajoqqaat imaluunniit meeqqap tamanna kissaatigippassuk.

§ 15-imut

Iliuusissanik pilersaarut sinaakkutissatut pilersaarutaavoq, taassuma iluani katsorsaaniissamik pilersaarut il.il. suliarineqarsinnaallutik.

Iliuusissanik pilersaarummi suliniutip sivilissusissaa sapinngisaaq naapertorlugu ersittariaqarpoq, meeqqap angajoqqaallu ilisimaniassammassuk qaammatit ukiulluunniit pineqarnersut. Aammalu ersarissarneqassooq suliniut

nalinginnaassumik inissiinerunersoq imaluunniit katsorsaanertalimmik suliniutaanersoq aammalu meeraq inuusuttorluunniit immikkut ikiortariaqarnersoq paaqqutarineqartariaqarnersorlu.

Iliuusissanik pilersaarut skemanngorlugu tamanut atortussianngorlugu ilusilersorneqartariaqaralarpoq (ajornanngippat qarasaasiakkut), tassani pisariaqartitsinerit ataasiakkaat malillugit iliuusissat pillugit immikkoortut ataasiakkaat itisilerneqarlutik. Iliuusissanik pilersaarut ilusilersorneqassaaq suliamik ingerlatsisumik aamma eqqaamasassat allassimaffiattut atorneqarsinnaasunngorlugu. Suliani ataasiakkaani paasissutissanut pisariaqavissunut, misissuinermi ingerlaaseq aamma iliuusissanik pilersaarut pillugit aalajangersimasumik paasissutissanik allattuiffeqassaaq.

Iliuusissanik pilersaarut siunnerfeqarluartumik kommunip suliniuteqarneranik meeqqamut qularnaarisuussaaq. Immikkoortukkuutaanik anguniagaqarnermi pissusissamisuussaaq taakkua piviusunngorsinnaallutillu uuttortarneqarsinnaappata, taamaalilluni ingerlaavartumik iliuusissanik pilersaarummik nalilersuisoqarsinnaallunilu iluarsiiisoqarsinnaassalluni.

Iliuusissanik pilersaarutip ilaqutariit oqartussallu allat meeqqamut meeqqallu ilaquataanut suleqatigiinnikkut attuumassuteqartut suleqatigalugit suliarineqarnissaa pingaaruteqarpoq.

Aammattaaq iliuusissanik pilersaarut ilaqariinni sulinissamik immikkoortortaqaassaaq. Immikkoortoq immersorneqassaaq ilaqutariinni sulisoqarpat sulisoqanngikkaluarpalluunniit. Angerlarsimaffiup avataanut inissiinermi iliuusissanik pilersaarummiissapput meeqqap angerlarteqqinnginnerani immikkut ilaqutariinnut suliniutigineqartussat ikiorsiiniutit il.il. qanoq ilusillit tapersersuinerillu aallartinneqassanersut.

Iliuusissanik pilersaarut ilaqutariinnik suleqateqarnermi aamma oqartussanik suleqateqarnermi atorneqassaaq, ingerlaavartumillu iluarsaanneqarsinnaassalluni suliani ataasiakkaani ingerlaaseq apeqquataatillugu.

Suliami ataasiakkaami iliuusissanik pilersaarut oqartussaasoqarfinnut assigiinnigitsunik sulialinnut / isumaginninnikkut attaveqaatitut sulialinnut sulinermi sakkussaasinnaavoq pingaaruteqartoq.

Angerlartitsinissaq sioqqullugu iliuusissanik pilersaarusiameissaaq meeraq inuusuttorluunniit qanoq angerlartinneqassanersoq aammalu suliniuteqareermermi malinnaaneq ingerlanneqassanersoq isummerfigineqassaaq. Isumaginnittoqarfiup pisussaaffigissavaa suliniuteqareermermi malinnaaneq pillugu suliami attuummassuteqartut peqatigalugit pilersaarusiussalluni. Ulloq unnuarlu paaqqinniffiit/angajoqqaarsiat allalluunniit meeraq pillugu suliamut attuummassutillit suliniuteqareermermi malinnaaneq pillugu pilersaarusiormermi peqataatinneqartariaqarput. Piffissap iluani suliniutitut ingerlanneqartussaq, suliniuteqareermermi malinnaaneq pillugu qanoq imaqaassanersoq, siunertaq tassanilu suliassat taassuma ingerlanerani suliarineqartussat paasinarsisimassapput.

Paatsooqatigiinnerillu pinngitsoorniarlugit ersarissunik isumaqatigiissusiortoqarsimassaaq suliassanut tunngatillugu kina qanoq iliussanersoq.

Suliniuteqareermermi malinnaaneq inuttut siunnersortimik imaluunniit tapersersortimit akisussaaffigineqarsinnaavoq.

Kommunip ukiumoortumik inissiinernik sulianik aaqqissuusseqqittarnerata qularnaallisissavaa meeqqanut inuusuttunullu ataasiakkaanut tamanut pissutsit naapertuuttuaannartuusut.

§ 16-imut

Meeqqanut inuusuttunullu, assersuutigalugu suliffik, ilinniarneq sunngiffilluunniit pillugit ilitsersorneqarnissamik siunnersorneqarnissamillu pisariaqartitsisorinartunut inuttut siunnersorti toqqarneqarsinnaavoq. Inuttut siunnersortip suliassaraa pissutsini arlalitsigut meeqqap inuusuttulluunniit peroriartornerani aamma/imaluunniit siunissami inuumermi sulinermilu atugassarititaasut pillugit tapersersortariaqarsorinartuni ilitsersuinissaq siunnersuinissarlu.

Tunngaviatigut ikiorsiinermeri inuusuttup akuersinissaa piunasaqaataanngilaq, kisianni inuusuttumut ersarissumik tamatumunnga akerliusumut inuttut siunnersortimik toqqaaneq nali-nginnaasumik siunertaqaanngitsutut oqaatigineqarsinnaavoq. Inuusuttoq akuersitillugu inuusuttup 18-ileereernerata kingorna § 27, imm. 2. malillugu ikiorsiineq ingerlatiinnarneqarsinnaavoq.

Inuttut siunnersorti tassaasinnaavoq atuarfimmi ilinniartitsisoq, perorsaasoq assigisaalluunniit, imaluunniit inuk meeqqamit tatigineqartoq, assersuutigalugu siornatigut ilinniartitsisuusimasoq imaluunniit siornatigut paaqqinniffimmi attaveqaataasimasoq, imaluunniit tassaasinnaalluni ilaqutariinnut ilaasoq nukissaqarluartoq, meeqqap kommunillu ilisarisisaasaat tatigisaallu.

Inuttut siunnersortip pingaarnertut suliassaraa meeqqap inuusuttulluunniit nammineq ingerlaqqinnissaanut aammalu inuttut iluitsutut inuttut allatut naleqassuseqarluni inuunissaanut periarfissanik siuarsaanissaq. Aamma inuttut siunnersortip meeraq inuusuttorluunniit imaluunniit ilaqutaasut peqatigalugit meeqqap inuusuttulluunniit attaveqaateqalernissaa sulissutigisinnaavaa.

Inuttut siunnersortip pisussaaffii pisinnaatitaaffiilu Naalakkersuisunit nalunaarutikkut aalaja-ngersarneqassapput taakkualu ullumikkut Namminersornerullutik Oqartussat nalunaarutaat nr. 2, 18. januar 1993-imeersumiipput.

§ 17-imut

Kinaluunniit meeqqamik paarisassamik tiguisinnaangilaq kommuni allaganngorlugu akuersissuteqaqqaartinnagu. Ilaqutariinnut paarsisartunut tamanut tamanna atuuppoq, nammineq aaqqissuutamik ilaqutariinnut paarsisitsineruppat imaluunniit kommunip aaqqissuutaanik ilaqutariinnut paarsisitsineruppat. Angajoqqaarsiat kommunimit akuerineqassapput, tassani qinnuteqartumut inooqaataanermi pissutsit misissoqjissaarneqassallutik.

Nutaatut siunnersuutigineqarpoq inuit paarsinissamut akuersissummik qinnuteqartut pinerluuteqarsimanermut nalunaarsuiffimmit takussutissiamik takutitsinissaannik aalajangersagaq.

Paasinarsisimappat paarsinissamik akuersissummik qinnuteqartoq taassumaluunniit aappaa / inooqataa allagartamik pillagaasimanermik imaqqanngitsumik takussutissiinnaangitsut, kommuni ataasiakkaani naliliissaaq paarsinissamik akuersissummik tunisisoqarsinnaanersoq. Pillagaasimanermi allagartamiippat qinnuteqartoq inoqatiminut persuttaasimasoq imaluunniit persuttaanissamik sioorasaarisimasoq, kinguaassiutitigut atonerluisimasoq assigisaanilluunniit pissutsinik ittoqartoq, nalinginnaasumik paarsinissamik akuersissummik tunniussisoqartariaqqanngikkaluarpoq.

Akerlianilli pineqartup meeqgerinissaanik piukkunnarunnaarsitsinngitsut pissutsit allat pineqarpata, suliami allaaserineqassaaq paarsinissamik akuersissummik tunniussinnginnermi kommuni qanoq eqqarsaatersorsimanersoq.

Meeqqanut ataasiakkaanut tamanut paarsinissamik akuersissut allaganngorlugu tunniunneqassaaq. Kommunip qularnaarsimassavaa ilaqutariit paarsisussat isumannaatsumik suliassamik nakkutiginnissinnaasut. Peqqussut atuuttoq malillugu ilaqutariit paarsisartut amerlanerpaanik meeqqanik inuusuttunilluunniit pingasunik tigummisaqarsinnaapput. Aalajangersagaq taanna atorunnaarsinneqassasoq siunnersuutigineqarpoq, tassani suliani ataasiakkaani naliliineq apeqquataassammat, kisianni soorunami qularnaarneqassaaq meeqqat paarineqartussat tamarmik inissaqarnersut, ilaqutariit namminneq meeraannut ajoqutaanngitsumik.

Paarsinissamik akuersissut ingerlaannartumik atorunnaarsinneqassaaq tamanna tungavissaaruppat, imaappoq meeraq inuusuttorluunniit ilaqutariinni paarsisartuni pissutsinik naammaginangitsunik atugaqartinneqarpat.

§ 18-imut

Ilaqutariit inuussutissarsiutigalugu paarsisartut nutaatut neqeroorutaapput, maannakkut atuuttuunatik.

Ilaqutariit inuussutissarsiutigalugu paarsisartut tassapput ilaqutariittut paarsinissamik immikkut ittunik tungavissallit, assersuutigalugu isumaginninnikkut sullissinissamut ilinniakkamik tunuliaqutallit assigisaanilluunniit inuussutissarsiorterme misilittagallit. Ilaqutariinni inuussutissarsiutigalugu

paarsisartuni inissineqassapput meeqqat inuusuttullu eqqarsartaatsimikkut annertuumik ajoqusersimasut imaluunniit meeqqat annertuumik sumiginnagaasimasut, imaluunniit meeqqat annertuumik timimikkut eqqarsartaatsimikkullu innarluutillit immikkut isumassorneqarnissamik paarineqarnissamillu pisariaqartitsisut.

Angajoqqaarsiat aappaa tamarmilluunniit ulloq unnuarlu tiimit 24-it piareersimasuussapput taamaattumillu allamik suliffeqarnissamik periarfissaqassanatik aammalu aningaasarsiornissaminnik pisariaqartitsisariaqanngikkaluarlutik. Ilaqutariit inuusutissarsiutigalugu paarsisartut tassanerupput paaqqinniffeeraq, perorsaanermik tunngaveqartumik maleruagassaqarluni sulisoq.

Angajoqqaarsiat marluullutik angerlarsimaffiup avataani inuusutissarsiutigalugu suliffeqarnissaat kommuni akuerisinnaavaa. Assersuutigalugu ullut tamaasa sapaatilluunniit akunneranut tiimialunnguit, meeraq inuusuttorluunniit ulluunerani paaqqinniffimmiinnerani atuarnaniluunniit.

Qularnaarneqassaarli meeqqap/inuusuttup angerlarsimaffimmiinnerani inersimasunik angerlarsimaffimmiittoqartuaannarnissaa. Angajoqqaarsiat arlaata tamarmilluunniit allamik inuusutissarsiutigalugu suliffeqarnissaanik kommuni akuersitinnani qularnaaqaassavaa meeraq inuusuttorluunniit atuarnersoq, ulluunerani paaqqinniffimmiinnerasoq imaluunniit angerlarsimaffiup avataani allatigut sammisaqarnersoq.

§ 19-imut

Aalajangersagaq manna aalajangersakkamit atuuttumit annertuumik allaassuteqanngilaq. Ilaqutariit nalinginnaasumik paarsisartut meeqqamik inuusuttumilluunniit ataatsimik arlalinnilluunniit angerlarsimaffimmini tigusinissamik suliassallu isumaginissaanut nukissaqartuussapput. Ilaqutariit paarsisartut paarsinertik ulloq tamaat suliffingngilaat marluullutillu angerlarsimaffiup avataani inuusutissarsiutigalugu suliffeqarsinnaallutik.

Meqqanut inuusuttunullu angajoqqaavi napparsimavimmi uninnganeq pissutigalugu sivikitsumik angerlarsimaffimmiinngikkallartillugit aamma meeqqanut inuusuttunullu sumiginnagaasunut innarluutilinnullu nalinginnaasumik ilaqutariit paarsisartut periarfissaasinnaapput.

Ilaqutariinnut paarsisartunut inissiinissaq, tamanna meeqqamut ajunnginneruppat, meeqqap inuusuttulluunniit najukkami inuiaqatigiit akornanniiginnarnissaanik pingaartitsineq naapertuuppoq. Meeqqap ilaqtatut qanigisaanut inissineqarnissaa akornutissaqanngilaq, taamaattoqartilluguli ilaqutariit taakku angajoqqaarsiatut allatullu paaqqinninersiuteqarsinnaanermik pisinnaatitaassapput.

§ 20-imut

Angajoqqaatut oqartussaassuseqartup nammineerluni meeqqaminut paarsinissaq isumassuinissarlu nukissaqarfiginngikkuniuk aammalu kommuni inissiissatinnagit angajoqqaatut oqartussaassuseqartoq nammineq aaqqissuussamik ilaqutariinnik paarsisussanik nassaarsinnaavoq. Imaakkajuttarpoq ilisarisimariikkaminnik meeqqamik inuusuttumilluunniit isumaginninnissaminik nukissaqarluartunik.

Nammineq aaqqissuussamik ilaqutariinnut inissiinermi angajoqqaatut oqartussaassuseqartup meeqqap inuusuttulluunniit pilersorneqarnissaa nammineerluni isumagissavaa. Ilaqutariit paarsisut paarsinissamut akuersissummik peqarnertik tunngavigalugu eqqartuussivik aqutigalugu meeqqanut akilersuutinik aaqqissuussinissamik qinnuteqarsinnaapput. Meeqqanut aappariinnerup avataatigut inunngortunut /imaluunniit angajoqqaat illoqatigiikkunnaarnerisigut aappaasoq aapparminut meeqqanut akilersuinissaanik akilersuutit nalinginnaasut pillugit malittarisassat atuuttut naapertorlugit akilersuinissamik isumaqatigiissusiakkut pilersuinissap aaqqissuunneqartarnera ileqquuvoq. Piumasaqaataavoq meeraq inuusuttorluunniit pisortanit tamakkiisumik pilersorneqassanngitsaq, imaluunniit meeraq qitornavissartaarnissaq siunertaralugu tiguneqarsimassanngitsaq. Ilaqutariit nammineq aaqqissuussamik paarsisussat peqatigalugit angajoqqaat meeq-qamik pilersuinissamik aaqqissuussinissaat aamma periarfissaavoq.

§ 21-imut

Ilaqutariinnut inuussutissarsiutigalugu paarsisartunut imaluunniit ilaqutariinnut nalinginnaasumik paarsisartunut inissiisarnermi aalajangersakkat nutaat akillu ilaqutariittut paarsisartuunissaq pilerinarnerulersissavaat.

Inissiinerit amerlanerpaartaanni meeqqat sumiginnagaasusarmata, siullerpaatut ilaqutariit paarsisartut pikkorissarnissaat pingaaruteqarpoq. Ilaqutariit paarsisussat suliasaminnik sukumiisumik ilitsersuunneqarnissaat tamatumani pisariaqarpoq. Ilaqutariit paarsisussat meeqqamut ilaqutaasunullu iliuusissanik pilersaarummik peqassapput, taamaalillutik pissutsinik aammalu meeqqap ilaqutaviini susoqarnersoq ilisimaarinninniassammata. Iliuusissatut pilersaarutip siunertai anguniarneqarneranut ilaqutariit paarsisartut peqataassapput, aammalu iliuusissatut pilersaarutip piffissap iluani naleqqusaanerme peqataasassallutik.

Ilitsersuussinermik nukittorsaanermillu il.il. kommuni neqerooruteqartoqassaaq. Ilaqutariit paarsisartut perorsaanermi ineriartortitsinermik suliaqarnissamik pisariaqartitsipput, tassani meeqqamut inissinneqarsimasumut isumaginninnermik suliaqarnissamik pikkorissiartuinnassallutik.

Angajoqqaarsianik nalinginnaasumik ilaqutariinnik paarsisartunik aammalu inuussutissarsiutigalugu paarsisartunik kommuni atorfinitsitsisuusaaq. Taamatullu angajoqqaarsiat inuussutissarsiutigalugu paarsisartussatut piukkunneqartut pisariaqartumik pikkorissarnissaannik neqerooruteqarnissamik kommuni

akisussaasuvoq, Pisorta qarfiulli akisussaaffigaa inuussutissarsiutigalugu paarsisartunut pikkorisaanernik naleqquttunik peqarnissaa.

Ilaqutariit inuussutissarsiutigalugu paarsisartut pillugit aalajangersakkat nutaajupput, taamaattumillu suliammut tassunga akissaateqartitsinissaq aalajangersarneqartussaavoq, tassaasinnaalluni nalinginnaasumik sulinikkut aningaasarsiaqarnermut nallersuussinnaasoq. Siunertaavoq ilaqutariit inuussutissarsiutigalugu paarsisartut inuussutissarsiorminni allanik isertitaqarnissamik pisariaqartitsinnginnissaat taarsiullugulu angerlarsimaannarnissaat meeqqamut inissineqartumut sumiginnagaasimasumut artorsaateqartumullu piareersimajuarlutik.

Inuussutissarsiutigalugu paarsisartunut atorfeqarnermi atugassarititaasut pillugit erseqqinnerusunik aalajangersaanissamik Imm. 2-imi Nalakkersuisut pisinnaatinneqarput. Pisinnaatitaaneq taanna nalunaarusiornikkut atorneqassaaq, tassani angajoqqaarsiat ataasiakkaat qanoq piumasaqarfigineqarnissaat pillugu nalinginnaasumik atugassarititaasut aalajangersarneqassallutik.

§ 22-imut

Aalajangersakkakkut paaqqinniffiit assigiinngitsunut agguataarneqanngillat, taamaattumillu meeqqanut inuusuttunullu assigiinngitsunik ukioqqortussusilinnut aammalu attaveqarnissamik, katsorsarneqarnissamik, sammisasaqartinneqarnissamik il.il. assigiinngitsunik pisariaqartitsisunut paaqqinniffiit Naalakkersuisut ataqatigiissinnaallugillu atorluarsinnaavaat. Maannakkorpiaq ulloq unnuarlu paaqqinniffiit katillugit 15-iupput, meeqqanik, inuusuttunik aamma innarluutilinnik tiguisartut.

Ulloq unnuarlu paaqqinniffinnut perorsaanerup tungaatigut Naalakkersuisut ilitsersuinissaat Pisorta qarfiup ulloq unnuarlu paaqqinniffinnut allaffiatigut isumagineqassaaq.

Maannamut paaqqinniffiit piusut Namminersornerullutik Oqartussanit pilersinneqarsimasuullutillu ingerlanneqartuupput. Aalajangersakkakkut siunissami kommunit paaqqinniffinnik kommunimit ataatsimit arlalinnilluunniit pigineqartut pilersitsinissaannik periarfissinneqarput.

§ 23-imut

Pilersitsinissamut, pisatsersuinissamut, siulersuinissamut ingerlatsinissamullu malittarisassanik aalajangersaanissamut aalajangersagaq tunngavissaliivoq. Piginnaatitsissut taanna atorluarneqarpoq meeqqanut inuusuttunullu aamma annertuumik innarluutilinnut ulloq unnuarlu paaqqinniffiit il.il. pillugit Namminersornerullutik Oqartussat nalunaarutaat nr. 64, 29. december 1994-

imeersumik aalajangersaasoqarnerani. Aalajangersagaqarpoq meeqqanut inuusuttunullu imaluunniit annertuumik innarluutilinnut ulloq unnuarlu paaqqinniffik pisatsersorneqarlunilu ingerlanneqassasoq taamaalilluni sapinngisaq tamaat ineqartut nalinginnaasumut qaninnerpaamik inuuneqalersinnaaqqullugit. Ulloq unnuarlu paaqqinniffimmi perorsaanermik sulineq aaqqissuunneqassaaq ineqartut ukiuinut innarluutigisinnaasaannullu ataasiakkaanut naleqquttumik.

§ 24-imut

Paaqqinniffik suleqatigalugu kommunip qularnaassavaa meeraq inissiiviusumut eqqortumut inissinneqartoq. Tamanna isumaqarpoq kommunip isumagissagaa meeqqap suliniuteqarfigineqarnissaminut pisariaqartitai paaqqinniffiup siunertaanut taassumalu immikkut suliassaanut naapertuuttut.

Kommuni inissiisoq paaqqinniffillu assortuuppata, apeqqut aalajangiiffigisasanngorlugu Namminersornerullutik Oqartussanut saqqummiunneqarnissaanik aalajangersagaq periarfissiivoq. Tamatuma suliassartaa Pisortaqarfiup ulloq unnuarlu paaqqinniffinnut allaffiatigut isumagineqartarpoq.

§ 25-imut

Aalajangersakkami naqissuserneqarpoq kommunit angerlarsimaffiup avataanut inissiinermi ulloq unnuarlu paaqqinniffimmut akiliuteqassasut ulloq unnuarlu inissisimaffimmut ataatsimut annertussusilikkamik. Akiliutaasartoq isumaginninnikkut tunniuttakkat pillugit kaajallaasitami takuneqarsinnaavoq.

Paqqinniffinnik ingerlatsinermi aningaasartuutaasartut siunissami akiliutissatut aalajangersaasarnermi aallaviussapput.

Tamatuma saniatigut ulloq unnuarlu paaqqinniffimmut inissiinermi meeqqap inuusuttulluunniit atisassaanut aataasiartumik aningaasartuuteqarsinnaavoq. Tassunga akiliutaasartoq isumaginninnikkut tunniuttakkat pillugit kaajallaasitami takuneqarsinnaavoq.

§ 26-imut

Ulloq unnuarlu paaqqinniffiit Naalakkersuisunut ukiumoortumik nalunaaruteqartassapput tamatumunngalu malittarisassat ersarinnerusut Naalakkersuisunit aalajangersarneqassapput. Ukiumoortumik nalunaarusiaq siullermeersumik 2001-mi tunniunneqarpoq 2002-milu Inatsisartut upernaakkut ataatsimiinneranni saqqummiunneqarluni. Ukiumoortumik nalunaarusiortarnissami siunertaavoq ulloq unnuarlu paaqqinniffinni pissutsinik paasisimanninnissaq.

§ 27-imut

Ikiorsiinermik unitsitsinermut imaluunniit angerlartitsinermut atatillugu §§ 14 - 15 naapertorlugit iliuusissanik pilersaarutit anguneqarsimanersut kommunip isiginiassavaa.

Peqqussummi atuuttumi ikiorsiinerup 20-inik ukioqalernissap tungaanut sivitsornissaa periarfissaqarpoq. Ukioqqortussusermik killiliineq taanna atorunnaarsinneqassasoq siunnersuutigineqarpoq, ikiorsiineq qanoq sivilutigisumik ingerlassanersoq ataasiakkaatigut naliliineq apeqqutaassammat, taannalu 20-ileereernermet ingerlasinnaavoq.

Kommunip inuusuttoq suleqatigalugu qularnaassavaa inuusuttoq 18-leereeraluartoq pisariaqartitai aallaavigalugit ikiorsiinissaq ingerlaannassasoq, inuusuttup ikiorserneqarnissamik pisariaqartitsijunnaarnissaata, taamaalilluni peqqussut manna naapertorlugu ikiorserneqan-ngikkaluarluni nammineersinnaalernissaata tungaanut. Suliassaq ingerlatiinnarnissaanut siunertaq iliussissatut pilersaarummi allassimassooq.

§ 28-imut

Meeqqap angerlartinneqannginnerani ilaqtariit paarsisartut aamma ulloq unnuarlu paaqqinniffik tusarniarneqarnissaannik imm. 1-imi aamma 2-imi aalajangersakkat qularnaarisuussapput. Ilaqtariit paarsisartut/ulloq unnuarlu paaqqinniffik suliamut attuumassuteqartuunngillat taamaattumik tusarniarneqarnissaat qularnaarniarlugu ersarissumik tunngavissaliinissaq pisariaqarpoq.

Ilaqtariit paarsisartut kommunimi allami najugaqartuuppata kommuni taanna aamma tusarniarneqassaaq, taakkua ilaqtariinnut nakkutiginnittuummata taamaattumillu suliami paasissutisseeqataasinnaallutik immaqalu ilaqtariinnit paarsisartunit paasissutissat pissarsiarineqartut eqqortuunerarsinnaallugit/eqqortuunnginnerarsinnaallugit.

Siunnersuutip matuma suliarineqalernissaanut atatillugu suliaqaleqqaarnermi Inatsisartunit kissaatigineqarsimavoq pisortaausut maalaarnissaannik periarfissinneqassasut, taamaalillutik meeqqap angerlartinneqarnissaa pinngitsoortissinnaallugu, naliliisimagunik meeraq ilaqtariilluunniit angerlartitsinissamut piareersimangitsut.

Maalaarnissamik periarfissap naleqquttuussussa nalilersoqqissaarneqarsimavoq. Ilaaatigut ajornartorsiutaasinnaavoq suliap Isumaginninnermut Naammagittaalliuuteqartarfimmi aalajangiiffigineqarnissaata tungaanut taamatut maalaarnissamik periarfissaliineq kinguarsaataasussaammat.

Aalajangerneq taanna qaammatit arlallit qaangiutereersut takkuppatt qularnangitsumik kommuni susoqaraluarpalluunniit suliamik nutaamik

naliliisariaqartussaavoq nutaamillu aalaja-ngiisussaalluni. Isumaginninnermut Naammagittaalliuuteqartarfiup kommunip aalajangenera atortussaattippagu, meeraq angerlartinneqarsinnaasimasoq, periarfissaavoq kommuni pisortamit taarsiivigineqarnissamik tunniussilluni ajugaasinnaasoq, pisariaqanngitsumik piffissami sivisunerusumi akiliuteqarnertik pissutigalugu.

Qulaani taakkartorneqartut aallaavigalugit pisortanut maalaarnissamik periarfissiinissamut taarsiullugu aalajangersagaliisoqarpoq paaqqinniffiup isummenera angerlartitsinissamut akerliuppat kommunilu angerlartitsinissamik kissaateqaannarpat, kommunip immikkut meeqqanik paasisimasalittut ataatsimiititaliamut suliaq saqqummiutissagaa.

§ 29-imut

Meeraq qitiutillugu sulisoqassaaq meeqqap pisariaqartitai aallaavigalugit, aammalu angerlartitsinnaanermi aalajangiinisaq ataatsimut isigalugu meeqqamut pitsaanerpaasariaqarnera apeqquataatinneqassaaq. Kommuni angerlartitsinnaanngilaq kommunip aningaasaqarnera aallaavigalugit.

§ 30-imut

Angerlarsimaffiup avataanut inissiinermik taamaatitsinerup nalunaarutigineqarnissaa aalaja-ngersakkakkut qularnaarneqarpoq. Ulloq unnuarlu paaqqinniffimmiigunnaartitsinermut tun-ngatillugu tamanna Namminersornerullutik Oqartussat paasisutissaatigereerpaat, paaqqinniffiit Namminersornerullutik Oqartussanit ingerlanneqarmata.

§ 31-imut

Meeraq annikitsuinnarmik sumiginnagaasimaneq tunngavigalugu inissikkallarneqarnissamik pisariaqartitsippat kommuni aalajangersinnaavoq meeraq inuusuttorluunniit ilaqtariinnut nali-nginnaasumik paarsisartunut inissinneqassasoq. Meeraq annertunerusumik sumiginnagaasimaneq pissutigalugu immikkut ittumik pisariaqartitsippat aammalu inunntu ikittuinnarnut attaveqarnikkut eqqissisimanerusumik avatangiiseqarnissamik pisariaqartitsippat kommuni aalajangersinnaavoq meeraq inuusuttorluunniit ilaqtariinnut inuussutissarsiutigalugu paarsisartunut inissinneqassasoq. Meeraq inuusuttorluunniit annertuumik sumiginnagaasimappat aammalu katsorsarneqarnissamik pisariaqartitsilluni kommuni aalajangersinnaavoq meeraq inuusuttorluunniit ulloq unnuarlu paaqqinniffimmut inissinneqassasoq.

Kalaallit Nunaanni inissiinissamik periarfissat tamarmik periarfissaajunnaarsimappata Naalakkersuisut aalajangiisinnaapput Kalaallit Nunaata avataani inissiisoqarnissaa akueralugu. Suleriaaseq malillugu imaappoq Danmarkimut. Namminersornerullutik Oqartussat Danmarkimi allaffiata ilaatigut suliaraa suliat ingerlaneranni siunnersuineq ilitersuinerlu aammalu inissiinerni ikiuuttarluni.

§ 32-imut

Inissiiviusumut ingerlaavartumik attaveqarnikkut qularnaarneqassaaq angerlarsimaffiup avataanut inissiineq ingerlalluartaannartoq aammalu sapinngisamik meeqqap inuusuttulluunniit pisariaqartitai annertunerpaamik isumagineqartut.

Inissiinermi anguniakkanut ilaavoq meeraq ullut arlaanni angerlaqqissasoq, taamangilarli meeqqamut inuusuttumulluunniit mianerinninnissamut tamanna akerliuppat. Meeqqap soqutigisai isumannaarniarlugit angerlartitsiartuaarneq atorneqarsinnaavoq, tassa imaappoq meqqap angajoqqaallu akornanni attaveqarneq ineriartuaartillugulu siunnerfeqariartuaartissallugu. Meeqqap inuusuttulluunniit angajoqqaaminnut uternerat toqqissisimasumik eqqarsaatigilluakkamillu tamatumani isumannaarneqassaaq.

§ 33-imut

Meeqqap angajoqqaaminut attaveqaannarnissaa inissiiviusoq suleqatigalugu kommuniq isumagissavaa. Meeqqap angerlarteqqinneqarnissaanut periarfissiinissaq kommuniq qularnaassallugulu isumagissavaa. Kommuniq sianigissavaa ilaatigut meeqqap angajoqqaaminik ilisarismanninnissaminik pisinnaatitaafii imaluunniit meeraq angajoqqaavinut illersussallugu, tamatumani angajoqqaanut attaveqarnermi meeqqap ineriartornissaa peqqinnissaalu ajoquserneqarsinnaappat.

§ 34-imut

Angerlartitsinissaq pillugu aalajangiinermi ulloq unnuarlu paaqqinniffinni pisortat maalaarnissamik periarfissinneqarnissaat pillugu Inatsisartut akuersaernerannut taarsiullugu siunnersuutigineqarpoq meeqqanik paasisimasalittut ataatsimiitamik pilersitsisoqassasoq.

Ataatsimiititaq inuttalersorneqassaaq suliffik aqqutigalugu meeqqanik inuusuttunillu suliaqartut akornanni, assersuutigalugu inatsisileritooq meeqqanik paasisimasalik ileqquusumik Naalagaaffiup sinniisoqarfianiit inuttalernerqartarsinnaassaaq.

Siunnersuut isumaqarpoq ataatsimiititaliaq suliani taamaattuni akerliusinnaatitaasoq. Suliap i-ngerlaqqinnerani ileqqussaaq suliaq ukiup affaa imaluunniit ukioq ilivitsoq qaangiunnerani qaqqeqinneqassasoq, aammalu piffissami tassani kommuniminngaaniit meeqqap angerlaqqinnissanut assigiinngitsunik suliniuteqartoqassasoq. Aalajangersakkami tassani naatsorsuutigineqarpoq angerlartitsinissamik akerliliisoqarsinnaasariaqarneranik Inatsisartut kissaataat akuersaarneqartoq.

Siunnersuutigineqarpoq ataatsimiititaliaq ukiunut sisamakkaartunut toqqarneqartassasoq. Ilaasorta q soraarpat Naalakkersuisut ilaasortassamik nutaamik ataatsimiititaliap atuuffissaata sinnerani atuuttussamik toqqaassapput. Ataatsimiititaliap atuuffissaa aallartissaaq matuma peqqussutip atortuulernerata kingorna ataatsimiititaliap ilaasortassamik nutaanik toqqaanermiit siullermit. Naalakkersuisut / Ilaqutariinnermut pisortaarfik ataatsimiititaliamut allatseqartitsissaaq.

§ 35-imut

Aalajangersakkami kommunit orniguttarfinnik pilersitsinissaat imaluunniit suliniutinik allanik meeqqamut, inuusuttumut ilaqutariinnulluunniit naleqquttuusorinartunik misiliinissaat periarfissinneqarpoq.

Suliniutinik pilersitsinermi kommuni Naalakkersuisut akuersinissaannik qinnuteqassaaq.

Qinnuteqaatip imarissavai.

Misileraarutip aqqa inullu attaveqarfissaaq
Siunertamik, tunngavimmik, suleriaatsimik annertussutsimillu
nassuiaat
Peqarpat piffissanik pilersaarut
Aqutsinermut pissutsit
Peqarpat aningaasanik missingersuutit aningaasalersuinissarlu
Peqarpat aningaasatigut kingunerisassat
Misileraarummik nakkutiginninneq

Naalakkersuisut suliniutinik akuersaarnissaanni siunertaavoq, suliniutit nutaat takkukkumaartussat ilisimaarinissaat naleqqummat kiisalu kommunit kommunimit ingerlanneqartumik ulloq unnuarlu paaqqinniffimmik pilersitserusuttut Naalakkersuisut nakkutiginnittussaataitaneranni ilaalertussaammata.

§ 36-imut

Peqatigiiffiit akuerineqarsimasut assersuutigalugu tassaapput Peqatigiiffik Kalaaliaqqat, Rude Kors aamma Red Barnet. Peqatigiiffik Kalaaliaqqat kommunimik ataatsimik suleqateqarluni meeqqanut inuusuttunullu orniguttarfimmik pilersitsisimavoq, tassani arlaannilluunniit peqquteqartumik unnuakkut angerlarnissaq ajornakusoorangat orniguttarfimmi inersimasumik nakkutigineqarlutik unnuakkut oqquiffissarsiorsinnaallutillu sinissinnaallutik.

§ 37-imut

Peqqussut naapertorlugu ikiorsiissutinut aningaasartuutit kommuninit aningaasartuutigineqassapput. Kommunit aningaasartuutai Landskarsip ataatsimoortumik tapiissutigisartagaani ani-ngaasaliivigineqartarput.

Inatsisartut paaqqinnittarfiit sananerinit ingerlatinnerinullu aningaasartuutitut tapiissuteqarsinnaaneranut periarfissaq peqqussummut atuuttumut naapertorlugu allanngortinneqanngilaq.

§ 38-imut

Meeqqanut inuusuttunullu 18-iliisimangitsunut, meeqqanut inuusuttunullu inissiivinni angerlarsimaffiup avataaniittunut inissisimanermi aningaasartuutitut isertitatik aallaavigalugit minnerpaamillu nalinginnaasumik meeqqanut akilersuutitut aningaasartat annertoqqataannik tapersiinissaminnik angajoqqaat pisussaaffeqarput.

Angajoqqaat akiliutissaasa annertussusissaannik malittarisassanik erseqqinnerusunik aalaja-ngersaanissamik aalajangersagaq tunngavissaliivoq, piginnaatitsissut taanna maannakkut meeqqanik inuusuttunillu ikiorsiisarneq pillugu Namminersornerullutik Oqartussat nalunaarutaat nr. 2, 18. januar 1993-imeersumi §§ 17 - 20-imiipput.

Isertitat SIK-tut ilinniagaqarsimangitsutut sulisut agguaqatigiisillugu akissarsiaatut annertussuseqarpata, akiliutissaq minnerpaamut, nalinginnaasumik meeqqanut akilersuutit atuuttut annertoqqataannik annertussusilerlugit aalajangiunneqassaaq. Isertitat annertuneruppata annertunermik akiliuteqartoqassaaq.

Kommunip angajoqqaat aappaa tamaasaluunniit akiliuteqanngitsissinnaavai, akiliuteqarnissamik pisussaaffeqarnermi pineqartoq ataasiakkaatigut naliliineq naapertorlugu imminut ilaqtutaminullu pisariaqartitanut naleqquttumik inuuniaannarnissaminnik ajornartorsiuteqalersinnaappat.

Erseqqissarneqassaaq inuusuttunut 18-ileereersimasunut angajoqqaat inuusuttup angerlarsimaffiup avataaniinnerani aningaasartuutitut akiligassinneqarnissaat soorunami inatsisitigut tunngavissaqanngimmat.

Aalajangersagaq atuuttoq meeqqanik inuusuttunillu ikiorsiisarneq pillugu Inatsisartut peqqussutaat nr. 9, 30. oktober 1992-imeersumi § 45-imi, meeqqap inuusuttulluunniit inissiinermi aningaasartuutitut tamakkiisumik ilaannakortumilluunniit akiliuteqartussaataaenera peerneqarpoq. Tamanna pivoq innersuussutigalugu meeqqap inuusuttulluunniit sunngiffimmini sulerusugunnaarneranut meeqqamut inuusuttumulluunniit akiliuteqartussaataaneq pisooqataasinnaammat.

§ 39-imut

Aalajangersagaq peqqussummi atuuttumi § 49-imi ingerlateqqiineruvoq allanguutigalugu erseqqissarneqarmat aalajangiinerit suut Isumaginninnermut Naammagittaalliuuteqartarfimmut ingerlateqqinneqarsinnaanersut. Tamatumuuna suliassat isumaginninnermut naammagittaalliuuteqartarfimmut ingerlanneqartartut amerlassusai killilersimaarniarneqarput suliassanut kommunip naliliisimaneranik tunngaveqartunut.

§ 40-imut

Aalajangersakkami erseqqissarneqarput pinerluttulerinnermut inatsit aamma peqqussummi aalajangersakkanik unioqqutitsinermi aamma naapertorneqassasoq, saniatigut aalajangersakkap malitsigaa inuit qinigaanikkut suliaqartut unioqqutitsippata pinerluttulerinnermut inatsit aamma naapertorneqassasoq.

§ 41-imut

Atortuulersitsinissaq 1. juli 2003-imut aalajangiunneqarpoq, taamaalilluni peqqussutissatut siunnersuutip akuerineqareernerani piviusunngortitsinissamut piffissaqarniassammat.

Naatsorsuutigineqarpoq peqqussutip matuma malitsigisaanik 2003-imi julip aallaqqaataa tikitsinnagu nalunaarusiortoqassasoq.